

劉

孟

塗

集

孟塗前集五言今體律詩卷四

桐城劉 開明東

秋夜懷人

木落楚雲端梅花笛裏寒  
何人對秋月獨夜憶長安  
雁信沉清浦龍山隔翠盤  
相思望湖水淚墮曲欄干

夜泊

亂石荒江郭垂楊古渡橋  
雲橫知雁過風靜覺天高  
影認前村火寒疑半夜潮  
酒家無地覓野草自蕭蕭

皖城卽事

霜重草驚秋江平月不流  
亂雲穿夾岸遠火辨孤舟  
舊雨書千里新愁葉一樓  
天涯多少淚不寄海西頭

落日下孤城風高一雁橫  
人憐今夜月秋憶舊時情  
未入華胥

夢先驚畫角聲東郊徒極目心緒若懸旌

春思

少有羅浮夢乘鸞到海東仙人明月下待我彩雲中瑤草當空綠  
天花墜地紅良時難再得消息任東風

公子桃花馬佳人桂葉船十年醉春色三月下晴川雲影不離水  
江聲長在天誰家吹鳳管響落畫橋邊

白玉蘭堂雲屏四面張珠簾挂高閣春酒對斜陽舞袖隨風起  
歌聲入座揚三春不行樂青鬢易成霜

借君鸞鳳笛吹我斷腸聲不是歸風操偏多送遠情有懷隨逝水  
無地覓層城芳草天涯路王孫舊日行

贈客

雲外木千章天邊雁一行有人來皖國對月憶瀟湘鄉遠書難

達秋寒夜欲霜飄零當此日愁思正茫茫

秣陵口號

水調唱梁州西風滿石頭月明千戶曉雨過四山秋壯志無人識歸心逐水流重陽一杯酒獨自灑高樓

宴集

璧月照雕梁流雲滿洞房爲君設華席携酒上高堂紫綺光初發清歌聲乍揚香風吹繞後堦下有微霜銀箭聲初轉金波影乍移良辰不盡飲他日又相思歌舞有餘態榮枯無定期君看庭下樹何似舊時枝

閨情

高樹夜涼起小樓秋思長含情問鸚鵡伏枕夢鴛鴦露滴自成響衾寒猶有芳妾身似秋草搖落不勝霜

偶懷

飛雁又天涯江頭自月華玉繩低欲落銀漢淡將斜繡幕生光彩羅衣起暮霞香煙無定所嘆息舊侯家

懷友

明月到銀壺春風入繡襦我今不爲樂花亦笑離居堦畔聞黃鳥樓頭見白駒茂陵病秋雨遙憶馬相如

雜咏

白露濕星河涼風吹素波佳人抱瑤瑟獨自發絃歌幽怨生絲竹薄寒侵綺羅蕭疎簾影外秋氣不勝多

柳岸復蘭洲輕帆任去留余情寄煙水秋意足沙鷗濕霧薄猶重晴霞低欲流行行更搔首初日在高樓

故人自南國遺我斷紋琴一鼓未終曲孤桐知此心虛堂含素

景涼竈起高林持以問流水煙波何許深

偶成

日落暮雲橫遙村鐵笛鳴我尋蘭棹客夜聽海潮聲更值秋風起吹來江月明愁隨一片影飛度六兒城

離家

握手一相別移時未過溪只緣人去懶不是馬行遲黃葉迷前路青山問後期徘徊無限意只許寸心知

偶興

涼風吹落葉秋思入雲端強與故人別誰悲行路難壯懷消夜雨久客厭儒冠又聽江城笛蕭蕭楚水寒

登舟一回首曉色在高林坐覺故山遠不知江水深浮雲無定意倦鳥有歸心欲辨來時路蒼茫隔翠潯

過家敏齋比部叢桂山房

初日上層嵐遙空影半含  
開門見山色對岸是江南  
昔挂天邊席曾尋雲外潭  
煙光隨處覓秋水不勝探

客有話天臺之勝者詩以贈之

東風江上路飛絮復飛花  
問子來何處尋春遍水涯  
東窮滄海月南望赤城霞  
傳說天臺客重游尙憶家

夜宿

晚來無一事散步至前村  
寺古雲生徑林空月在門  
亂泉流不競棲鳥定無喧  
領此靜中意夜深何所言

晚泊

竟日閉門坐當牕微見天  
乘舟過空渚芳草滿平川  
日落鳥初下雲開山到前  
所思近何處遙指楚江船

石上

坐久興初倦溪頭葉落遲水行雲定處露下月歸時語小幽禽  
覺寒生高樹知前峰瞻已遠獨對起遐思

晚歸

客行隨落照不覺到柴關暝色分高下暮雲相往還蟬鳴秋在  
樹鐘動響連山回首碧天迴心同野鳥閒

客中有懷

落葉不堪掃客心當奈何煙花前歲好月色故園多天末音塵  
杳江頭鴻雁過煩君去傳語秋在桂山阿  
水落辭高岸花飛憶舊林此時游子淚昨夜故人心涼月時侵  
戶秋風欲滿襟沉吟歸未得不敢告知音

晨起上高臺雕牕四面開捲簾山翠入拂袖曉風來偶讀左徒



傳因傷太傅才斯人竟淪落千載水雲哀

靜坐

閉目無秋色寒山入我心坐忘風露永靜久夜蟬吟幽意自終  
古微芳留到今起尋松際月雲影碧沉沉

雜詩

北院珊瑚樹東城玳瑁樓晴雲低繡戶初月上銀鉤拂袖紅芳  
落開軒素影浮笙歌人滿座夜永不知秋

河漢垂東壁明星皎夜光紫雲催進酒碧玉暗添香霞起芙蓉  
幕風生薜荔牆庭中何所見七十二鴛鴦

鬪鷄長樂外走馬石橋邊芳草映珠勒楊花拂玉鞭彎弓驚月  
滿揮劍看雲連笑語東吳客周郎方少年

儂有連城璧携來置蕙幃芳春無賞識涼夜起光輝坐恨清商

發旋看白露稀行行重戶下不覺淚沾衣  
今我來何夕華燈豔郡城飄零天寶曲宛轉畫樓聲白璧雙環  
解黃金一笑傾只愁風露冷杯酒不勝情  
蛾眉麗鏡端三五月團圓皓彩無人惜深闌竟夜看飛鴻傷歲  
晚絡緯怨秋闌悵望將何極梧桐露正寒

江上

危檣連斷岸荒戍近層臺山縱飛雲出風先驟雨來遙村天曠  
遠永夜角悲哀鄉國音書杳征鴻罷往回

京江望遠懷朱歌堂孝廉

一氣連吳越微茫盡在前山橫秋雁外天盡海雲邊遠客歸何  
日離愁共舊年高亭時極望空見北來船

江樓

獨樹近高樓悲懷正暮秋古今看過鳥身世落孤舟好友多京國孤棲自楚咻思歸問江水目斷此東流

秋夜懷人

今夜西風裏秋心落滿湖水聲流不去月色照還孤天末人何遠雲端路各殊有懷愁不達獨坐失歡娛

偶感

澤國人歸處遙天日暮時怨春花別樹驚月鳥啼枝心事餘長劍功名理釣絲蒼茫江上意寂寞有誰知

客中懷石甫

高城愁別日江路向春分行止頻憐月憂思獨對雲吳山寒到客粵海遠憐君應聽歌船曲題詩滿練裙

城樓曉望

曉霧散初晴羣山遠更明日高猶海氣風斷自江聲故國空花  
鳥元戎已旆旌傳聞關報近早晚欲巡兵

客思

風急雁行斷飛來影不雙燈寒樓近水星淡露橫江有酒投煙  
渚無愁寫夜牕遙思淮上客應蕩木蘭艘

道中過龍山

野樹微風外深山古徑前暗泉聲入地遠霧曉無天疲馬歸猶  
晚寒花折未旋龍眠又春色感嘆歲時遷

寄從弟

汝去原非計吾歸更幾時那能同作客況是各相思嶺樹遮偏  
早江魚到故遲晴嵐橋下水空說近雷池  
路長連楚北秋盡阻江邊及汝言歸日思家已暮天清宵吟共

迥白日起還眠孤館臨流意殷勤語雁邊

寄從妹韻芳

相見復何歲涼天秋水深  
早時容易別獨夜去來心  
月好悲誰語霜寒莫更吟  
大雷書未達惆悵憶江潯

奉懷四叔

故里多詞藻吾家早擅文  
今宵咏秋月不共阿咸聞  
舊徑思修竹高天隔片雲  
不才徒自惜楚水有遺芬

得家書有感

滿地秋聲起故山風露高  
可憐兒長大不慰母劬勞  
自昔嘗熊膽旁人說鳳毛  
那知霄路遠日夕走風濤

記得離家日風吹落照寒  
丁寧慎行役珍重涉波瀾  
衣敝猶重着書來不忍看  
恐煩游子意只是說平安

聞韻芳妹病愈喜而賦此

去日難爲別歸時未易留經年才一見小病已三秋句好愁空寄書成發更收可憐門外水爲汝日西流

近得家山信傳聞已報痊尙憂涼月夜須慎早寒天勉力隨人後關心到雁邊何當倚雲閣相對話當年

曾記垂髫日偕行出畫廊牽衣隨阿姊小語問高堂夜雨張燈火春風侍酒漿此情猶在眼故國幾星霜

別促緣何事情深不盡辭書傳人去恨吾惜汝能詩雲樹空詞藻江天易怨思歸寧如有意早遣還人知

和鄭明府三峽泉詩

水自雲邊下山從峽口回有天翻石壁不雨亦風雷怪樹森爭立崩崖怒忽開中流長噴雪六月早寒來

客中偶感

異地淹留久天寒曉夜同月高花有露霜重野無風人已經春  
別書還隔歲通所親應悵望楚水日西東

入山

亂樹鎖雲關危峰落日閒池光如出水石勢欲離山古徑尋偏  
杳游人到更閒風塵無樂事長此寄心顏

卽事

天挾雲爲障山高草易秋疎林孤曉色亂石破寒流懷古風生  
徑思歸客上樓殷勤南渡鳥煩汝過江洲

夜泊有感

斷山連絕岸修閣倚重霄夜氣難爲月江聲不讓潮望窮空際  
樹聽到曲中簫欲問朱樓客酣歌幾暮朝

江上曉起

霧失三江水雲排萬疊山驚風吹忽散高鳥去猶聞曉變晴峰  
外寒凝古渡間霜花飛不得天半有人還

殘臘歸途阻雪

東望家山路寒冬尙未歸天涯將盡歲身上舊縫衣雨雪行難  
達晨昏願久違關河知己近辛苦憶庭幃

煙樹迷無辨江頭路不分已愁今夜雪尙望故山雲旅夢因人  
遠濤聲拍岸聞此時悲作客不是爲離羣

澤國歸何暮江天露已寒重來他日恨異地暫時歡目斷千帆  
外心懸萬木端倚門方有淚獨處忍求安

風已同南國春將到北林半生難說事千里未償心長路何由  
息嚴寒此處深相知憐我病中夕起沉吟



秋懷

初月照羅帷空庭生夕輝徘徊風入戶徙倚露沾衣莫訝秋聲  
早請看梧葉飛江波千萬頃寧識客心悲  
閉門未終日愁緒來無端起步堦前月秋風吹夜寒且將一樽  
酒暫假片時歡只恐露華結青霜凋蕙蘭  
茫茫江上月何日到柴扉不識居鄉樂寧知去國非浮雲終北  
往流水自東歸請謝天邊鶴高情與我違

雜興

美人不可思明月難爲期坐待江天曉寧無雨露時野花各有  
態山木更連枝試看高飛鳥中途何所依  
銀蟾青琅玕珊瑚赤玉盤換來吳市酒張飲楚雲端莫倚今宵  
醉而忘昨夜寒高高天漢上星斗已闌干

宿昔

宿昔同歡愛，今爲越與秦。  
羅衾冷芳澤，寶帶生微塵。  
願得奉君，子永言終此身。  
瓊瑤有芳思，何以致江濱。

贈程顧卿

送君岐路隅，執手復躊躇。  
腰下解長佩，風前攬繡裾。  
容光空自好，聚散忽須臾。  
遙望日暮憐茲七尺軀。

方舟

方舟臨遠水，將以覓相親。  
翠佩沉清渚，幽期託白蘋。  
仙人無定所，楚國已陽春。  
孤鶴巢瓊樹，何能結作鄰。

孟塗前集五言今體律詩卷五

桐城劉 開明東

寄懷張竹軒

客豈論詩地吾猶舊日心  
愁中聞汝去病後覺秋深  
事業宵燈在年華鬢雪侵  
離鄉同有恨莫遣雁書沉

大木

久不求人顧風雷忽夜來  
出雲天半黑穿地石爲開  
積鐵千年幹名山一代材  
託根宜得所慎莫傍高臺

讀史雜咏

北嶽精靈護中天積翠通  
曾開宣室殿不起玉華宮  
紫氣臨城近黃花作鎮雄  
由來形勝地終跨古雲中  
同姓隆周室多材用楚人  
賜來龍節貴剖去虎符新  
謀國惟家

法當關仗重臣不知圖畫外地上幾騏驎

聞道黎陽決張騫未泛槎風聲驕白浪人力困黃沙三策今何

用千家慘不譁桑田來往處終古漾桃花

倉卒興輸役艱難憶老成已添都水監更設大舟卿白馬河邊

吏蒼龍埽上兵但須紓國患不用衆成城

三十鍾何惜唯資轉運賢汎舟仍碧海引粟更青天難避河陰

險徒傾外府錢溯流望西北多有未耕田

海國原千里沙場變一朝無風塵撲面有雨地生潮溝洫書徒

在司空令寂寥可憐虞學士辛苦奏中朝

俠少三河客城虛五步樓難留鸚鵡粒但典騶駟裘禾黍中原

地桑麻幾處秋古來丞相重只號富民侯

使者出長安傾城屬目看力能作劉晏豈必問桓寬障水防場

濫煎沙懼海乾年年歌舞夜落月萬家寒

全盛談天寶雲門奏夕曛折衝羞講武都護奉虛文虎衛疎無用魚書廢忍聞承平尙嚴備獨憶杜將軍

紅襖輕天網黃巾逼漢營中軍高樹纛大將坐論兵衛霍新加秩吳韓舊有名不堪青海外戰骨日縱橫

記室青油幕參軍白練裙無端同宴飲邂逅得風雲長劍趨龍闕仙班絕鷺羣入關回望月新鬼哭邱墳

詔恤淮陽困春憇婦子耕至尊憂累日流涕爲蒼生冤獄孤城起忠靈九殿銘漢家循吏傳嘆息總悲情

東越生妖鳥南邊起戍臺火風腥不散海霧暗初來戰士黃龍艦元戎紫鳳杯徒令無忌死握節語猶哀

花月玻璃國干戈柱石臣可能比孫處先說斬盧循伏鼠何難

信飢鷹竟易馴五羊城畔客且醉嶺南春

閩闔開青瑱蓬萊漾碧波功臣麟閣少內史鳳池多門下羅金戟郎中佩玉珂可知山石下羞殺舊藤蘿

舊禮存三百新書試九千如何麟趾格張遍鳳頭箋東觀論經罷西京用法先平陽真相國酣醉五雲邊

白下車初散蘭亭會已稀過江名士晚絕調故人悲水自含秋色山猶怨落暉風流舊張翰游宦早思歸

山峙雄風在江空霸氣消無人懷北府有客愛南朝鐵板紅牙管珠樓碧玉簫桓伊聞不得秋水思飄搖

節鉞仍南國笙歌擅上游花迎新刺史月認古揚州壁樹春難曉瓊花夜欲秋只愁淮泗水流近海西頭

舊恨吳宮草零香茂苑塵浣花衆兒女不解避行人開府歌船

逐良家法出新俗游莫歸去此地足陽春  
列戟通侯第高臺故相家移來金谷樹飛出玉樓花游女三雲  
髻公孫七寶車尙嫌今夜月天上關繁華  
叢桂空山質幽蘭處士芳琴因中散斷賦爲左徒傷雲水思何  
極神仙夢渺茫荒臺歌白雪暮雨正悲涼

寄石甫

苦恨青山路偏從客裏過異鄉惟爾我遠夢有關河飛雁隔年  
到秋聲雜雨多離情言不盡各自慎風波

江樓有感

江水真無賴滔滔竟向東客愁何日盡人世此樓空遠樹飛雲  
外孤帆落照中無心看秋色況乃聽征鴻

龔冲泉贊府有雜咏詩六首余倣其意廣爲十律

斷碑

片石千何事風霆怒有神幾行留款識半面臥沙塵摧折因文字模糊認漢秦可憐苔蘚迹埋沒舊時人

破寺

不謂深林內鐘聲去莫留虛堂難掩月曲徑不藏秋龍象空山泣神靈古殿愁一燈青欲斷猶自照危樓

羸馬

更莫言追日塵埋足不高一鳴吾尙惜千里爾空勞病骨驚加策雄心東正牢死生猶可託誰是九方皋

病童

一臥還憐主天涯覺獨親那能負琴劍強起共風塵竟日無人事中宵有鬼神呻吟猶未敢況復話艱辛



老樹

本因關雷雨剝落到而今已失千尋勢猶留半死心婆娑無鶴  
宿盤曲作龍吟偃蹇人誰惜雲橫洞口深

古琴

痛惜鍾期死千秋汝尙存賞音何寂寞此調在乾坤鳳曲餘哀  
怨龍門認舊根莫將絃外意輕與近時論

野渡

四望無人至蒼茫一釣舟亂沙飛更落淺水斷還流平野連空  
暮殘陽到岼秋草深稀馬跡時見立沙鷗

秋燈

夜雨今何處分明酒未闌已看人影瘦還照客心寒信卜三秋  
遠光分兩地難何人歸最早兒女話團圓

困鶴

直上無千仞孤鳴倦九臯  
病身驚露早素志共雲高  
寥廓留音響空山惜羽毛  
松巢休久臥燕雀已游敖

飢鷹

生有凌霄翮三秋豈易馴  
飛來無過鳥飢甚恥依人  
欲下盤旋久憑高顧盼真  
請看風急處厲吻動蒼旻

懷鄭明府

同此空江影朝來兩岫分  
已知春近客沉復我憐  
君山缺疑吞日林深易宿  
雲舊游多勝迹好與故人  
聞

重咏大木

盡道參天好扶持卻賴誰  
古來重梁木海內幾工師  
邱壑身如故風霜力獨支  
能垂千畝蔭不在最高枝

夜過小孤山

天圍山四面月到水中心獨立遺人世孤雲共古今江流疑楚  
盡蒼翠入波深千載宮亭裏蛟龍不敢侵

題錢芷汀四丈紉芷圖

沅渚夜潮起空江秋水平美人隔遙夕香草露孤英枝向雲中  
採寒從衣下生三閭不可見懷古有餘情  
君携芳芷去迴棹楚江濱聊以媚幽獨休勞贈遠人香寒凝白  
露日晚怨青春豈不思公子浮雲遮滿津

懷陳大治

朝英寒不採白露生空林之子隔長道涼天違素心相思空復  
永良會遠難尋遺我一書札但言秋氣深

送雲朗

南樓沽美酒西市買冰盤一酌勸君醉再來誰素歡瓊枝生怨  
色華月散清寒親製伯牙操臨行不復彈

感逝

盛年難再得容彩有銷沉自恨春華暮猶懷秋夜心薄帷隱涼  
月微響生瑤琴聽我訴孤怨堦前雲正深

懷舊

我昔游仙館臨軒見羽裳芬芳遺素手婉戀結中腸翠羽空江  
上明璫隱漢旁歡情徒夢想繾綣未能忘

送師二歸滇

片月送歸舟君行不可留風吹雷岬笛秋到楚江樓聚散如飛  
鳥浮沉羨野鷗挂帆天萬里雲水不勝愁

出郭氣蒼茫天邊是故鄉不愁江路遠但恐夜風涼努力愛光

景乘時挹衆芳青雲終有路孤雁且南翔

秋柳

本不禁攀折何堪更值秋此時千里別前度六朝愁南國人停  
馬西風客繫舟寒蟬聽不得煙雨暗高樓  
送客今猶是難爲舊日顏裴迷灞陵岬消瘦白門山落日方憑  
弔行人又往還靈和風調好憔悴半年間

過某中丞居

居近碧雲鄉人呼綠野堂寒梅瘦春色古渡浸斜陽欲訪深山  
徑重飛舊羽觴煙霏淡將夕霞氣入西廊

寄友

浪迹三千里胡爲復遠遊昔傾燕市酒今泛廣陵舟久客身空  
健傷春酒亦愁拂衣須此日莫更上江樓

懷陳大治

蕭蕭木葉下嫋嫋秋風多芳草正懷遠空江寒欲波芙蓉望天末蘿薜隱山阿嗟爾蹇修子雲冠空自裁

感興寄何四

漢南多蕙芷江畔荷蘭蓀煙水寒如許秋懷不敢言雲深愁帝子歲暮怨王孫望遠傷搖落孤芳誰爲存

古意懷魯南畹給諫

春晚蘭爲佩秋寒菊有芳予愁曰千里彼美天一方暮雨在何許丹霞餐未忘永懷生楚渚終古此徬徨

過屈原祠

白日莫余知江頭從此辭衆芳爭歲發百鳥怨春遲鸚鵡泣香草鳳凰憐故枝荒祠誰共語澤畔獨愁思

讀騷得咏

步彼蘭皋，悲茲蕪興。蕪紛吾懷，寶璐將子。以瑤珠言結青虬，  
仍往從文鳳，趨故都。胡可戀舉國正歡娛。

寄興

採芳過極浦，捐袂向中洲。神物終難見，靈修敢自尤。佳期愁渺  
渺，長夜去悠悠。網戶微生露，抽思孰共秋。

卽事

登高空騁望，臨水悵忘歸。吉日游椒館，回風生桂旗。榮華看落  
葉，年歲惜芳菲。容與江皋上，初心嗟已違。

垂釣

我釣將奚適，言觀彼一方。不知河水淺，只道竹竿長。巨鮪潛依  
藻，鳴鳶已在梁。絲緡本無用，永棄復何傷。

偶興

喬木依何處朝陽又夕陽中心悼鳥鵲左翼惜鴛鴦人去經三  
歲天高轉七襄殷勤問雲漢幾日始成章

俟我

俟我北山下偕行南澗邊誰云流水曲曾不爲君旋載簡人何  
往縫裳女自憐可知江漢月今夕麗中天

懽情

朱繡初從日元黃未續時木桃投去遠勺藥贈來遲君意猶難  
識人言豈得辭且看中沚誓皎日以爲期

游女

游女佩瓊瑰懷春獨上臺已期通永好未敢恃良媒瓠葉思難  
濟常華采未來平林風夙報毋使雉鳴哀



江上望遠

大江留客處  
皖口泛舟時  
煙水三千里  
青山中間之  
欲游不可  
得  
思濟亦何爲  
且與故人約  
龍眠採玉芝

孟塗前集七言今體律詩卷六

桐城劉

月夜

地聳城樓勢接天  
江流吳楚遠橫煙  
鯨吹海月知潮上  
雁送秋心到客邊  
霜露極空驚四望  
星河入夜照孤眠  
誰家砧杵寒生怨  
井作風聲欲過船

漫興

高高朗月照清河  
河上佳人倚瑟歌  
自惜紅芳秋正晚  
寒生白露夜來多  
西風吹動愁煙渚  
南雁飛遲尙水波  
且向芙蓉問消息  
涼天幽怨近如何

秣陵口號

建業雄風落日邊  
秦淮久已靜戈船  
一杯剩水興亡局  
半壁南

朝醉夢天花月至今娛士女樓臺自昔跨山川  
胭脂狼籍傷春地無復冬青叫杜鵑

寄懷馬獻生

我寄迢迢尺素書問君別思近何如淮南花發春多少  
江北風來雁有無雲樹每宵勞遠夢關城到處憶行車  
歸來好結魚鱗屋共上層臺望紫虛

皖城卽事

落木蕭蕭夕照收皖公城勢遏江流飛來海上三山月  
盡是人間五夜秋雲出楚吳迷遠樹浪翻星斗入孤舟  
如何立馬橫橋北不見旂旗舊酒樓

登大龍山

天風吹日洞門開龍起高原走復回山氣欲隨吳水去  
江帆直

楓楚雲來千家楊柳連城郭九朵芙蓉入酒杯回首鸞旗射蛟  
處暮煙遙接漢皇臺

客夜

銀漢無風火自流黃昏人在月西頭秋聲入枕難成夢露氣橫  
江欲上樓明日鄭元離北海早年徐穉重南州不圖馬上青袍  
敝猶自天涯擁蕙幃

舒六道中

古驛寒城隔水隈征途日暮獨徘徊文翁故宇成秋草虞士荒  
祠冷石苔一路雲山人北去半天霜月雁南來客中休憶銀絲  
膾多少飢烏覓野菜

感賦

絕嶺風寒下碧楸霜花飛落木棉裹白雲已變他鄉色黃菊應

留故國秋赴洛陸機思作賦出關王粲莫登樓河干荒郭臨沙  
岸簫管何人起桂舟

潁州感賦

三十六峰秋到門獨騎瘦馬走遙村投林倦鳥驚風雨出岫浮  
雲變曉昏碧水東移非舊壑黃塵北望是中原壯遊自古男兒  
事況有文章謁謝琨

青霜碧草路茫茫繞郭飛沙接大荒山過湖聲盤潁上雲移秋  
色淡淮陽鄉心不向關城落客舍偏知歲月長恨殺座中年獨  
少錯教人說杜黃裳

天風吹夢墮梧桐起見殘霞挂碧空千里湖山鴻爪下一秋心  
事馬蹄中平沙潮落痕猶白高館燈寒影不紅更捲珠簾開錦  
席洞簫聽罷月如弓

石葉香浮瑪瑙盤。畫屏斜映曲闌干。牕經暖日通花氣，月爲誰  
人增夜寒。夾道秋深紅樹老，四山雲散碧天寬。板橋多少如珠  
露，不待成霜各自圓。

此身悔到綺羅叢。馬首何時更向東。山氣入樓疑有雨，曉寒歸  
樹欲生風。芙蓉故院笙歌息，禾黍平原野望通。寂寞荒郊煙水  
外，不堪重問漢安豐。

登高目送飛雲出。弔古心同片月孤。決水幾時穿繡壤，陽泉有  
迹沒平蕪。城南曉色空池館，天末涼風自竹梧。千載潁川雄傑  
地，奇才誰繼管夷吾。

北過長淮卽豫州。汝南煙景望中收。風盤高嶺聲難落，天入澄  
潭影不流。去國詞人悲落日，感時循吏倚孤樓。請看芳草堤邊  
柳，猶送如溪水上舟。

棄擲張華麟角筆蕭條羅隱雁頭箋幾家鐵笛來秋怨半夜銀  
河近客筵灑酒月從杯下落望鄉心在斗邊懸歸期莫待梅花  
發風雨高堂淚眼穿

自霍邱抵壽春界有懷

大別山前水又分天寒征雁尙成羣白蘋秋遠連淮渡黃葉聲  
高入暮雲蓼國遺民徒好武壽春飛閣又斜曛登臨莫笑南朝  
弱曾破秦人百萬軍

尺素江南去未還天涯孤棹且雲灣如何楚客芙蓉水不到淮  
王桂樹山千載風流搖落後一時仙迹有無間暮天懷古多蕭  
瑟況對寒城憶故關

感秋

浪迹江城已七年秦淮油壁汝南船自知谷口風難靜無那天

邊月又圓撫劍歌殘人去遠思家心共火爭然寒煙衰草王孫  
路白髮門前望倚鞭

沙隄中斷阻荒城深夜風低月正橫白雁飛來秋有色蒼龍吟  
罷水無聲高樓牕敞迎霜氣異國天寒見客情便欲海西尋舊  
識卽從淮上認歸程

故鄉迢遞隔關河中散山庭有翠蘿別去花開三徑少悲來秋  
爲一人多天邊曉色猶黃葉江上寒煙自碧波捲起疎簾望高  
閣夜深恐有雁羣過

金陵懷古

建康東望莽蕭蕭紫氣黃旗舊迹遙地轉樓臺成北闕天教花  
鳥媚南朝火龍運已傾三國銅雀人空憶二喬欲起周郎重顧  
曲涼風吹斷碧筠簫



總戎官已列通侯開府軍皆據上游南渡幾人思舊業東流一  
水隔神州秋風戰馬嘶吳會落日新亭泣楚囚可惜白頭劉太  
尉感時獨坐朔方樓

勸進文書達上方君臣端坐繫苞桑徒令鐵騎橫河北不記銅  
駝臥洛陽王謝勲勞有絲竹東南城郭本金湯君看百萬投鞭  
日奇算何須出廟廊

寄奴威望冠羣英再世龍墀又喜兵闌外未曾殲大敵國中先  
自壞長城雷公學舍空鐘鼓楊子樓船盡旆旌獨使書生籌武  
略老臣終少恨吞聲

元武湖高落日懸金根玉柱總浮煙千秋風雨悲袁粲一夕江  
山變褚淵碧血可能成杜宇白雲空自傍寒蟬竟陵八友今誰  
在寂寞高樓舊管絃

蕭公提劍決飛虹華蓋高懸建業宮已設重雲開月藻更看花  
雨散春風青袍軍起文絃寂白馬人來武帳空太息咸陽舊詞  
客暮年作賦憶江東

結綺臨春近紫軒龍涎盡散九華門上流形勝歸鄰主南國煙  
花奉至尊夜火游歸星錯落後庭歌罷月黃昏麗華不死高公  
劍香草誰埋萬古魂

陵谷升沉歲月更六朝王氣有叢荆寒煙碧瓦尋荒殿落日青  
山望故城龍虎不須矜地險鳳凰未必向臺鳴蒼茫一片興亡  
恨散作空江暮雨聲

擬古

妾家深院接高梁門對城南水一方幾曲珠簾初見月三春蘭  
蕙正餘芳曉鳥啼罷風生樹秋燕歸時夜欲霜侍女添香又吹

笛不知更漏爲誰長

偶興

浩蕩南天一酒星題詩更望古滄溟沙頭風急霞光斷夜半潮  
來水氣腥獨惜金龍投宋嶺終教玉馬出吳舫城西一片荒山  
石闕盡興亡不改青

吹笛投金事渺茫青溪花發舊祠荒小姑心可如寒月大令歌  
終付夕陽山色千年迷故國秋聲一夜渡橫塘江東詞賦無今  
古獨步何人識謝莊

歸至途中有感

寒雨迷空草不春歲華搖落尙風塵才高真悔逢知己客久翻  
多累故人建業青山留別恨池陽碧水問前津生平負有王通  
策獨向江天看白蘋

長劍何勞倚太清高樓日夕望歸程異鄉花柳都無色故國  
燕亦有情落木天空鴉背冷悲秋人瘦馬蹄輕征途十月多霜  
雪江上寒梅笑此行

左徒曾戴切雲冠供奉空持釣月竿國士名高輸馬骨故人情  
重有豬肝臨風蒲柳秋先落出水芙蓉露不乾終是江南行樂  
地幾回搔首碧雲端

閨盡潯陽九派流人間起伏總浮漚阮公痛哭非關路宋玉多  
愁豈爲秋鸚鵡籠中言已拙騏驎地上跡空留青山不用遮行  
客夜夜鄉心繞畫樓

皖城口號

烏兔山前柳色新青袍人過楚江濱孤城夜雨千家夢百里煙  
花兩地春新燕他時應識主歸鴻前歲尙爲賓天涯舊雨無消

息落曰浮雲伴此身

客館咏懷

春色何能到客心淮南江北獨沉吟孤雲變滅隨今古衆水分  
流各淺深金谷杯寒前夜酒銀箏絃動故園音關河四望皆青  
草飛鳥朝朝繞舊林

浩蕩滄波酒一杯茫茫身世此登臺青霄風急雲無恙白晝寒  
消霧不開江遠帆從天外落雁高書自日邊來馬卿游倦車輪  
折憔悴人間作賦才

夾江花柳連都邑三楚煙塵隔故關月色未殊滄海上春風又  
到碧雲間崎嶇陌路天昏曉縹緲城樓日往還倚劍休窮千里  
目長淮波浪已成山

絡繹輕車走路周玲瓏飛閣起神州深山不雨龍蛇出大野無

風燕雀遊洪水東南皆巨壑浮雲西北卽高樓故鄉亦近淮陽  
地矯首天邊落日愁

西窺彭蠡三江月南望金陵六代山天外雨聲催過客馬前春  
色近鄉關名花開落園如故急水奔流岸自閒官閣且休澆濁  
酒春風從不上愁顏

連朝濡筆賦西京十二朱欄看晚晴楊柳樓高齊嶺色桃花浪  
湧助春聲彩雲一片飛龍笛舊雨三年隔鳳城正是簾前歌舞  
處相思忽起暮煙橫

季鷹老入江南道

謂姬傳先生

碧樹瑤華帶露栽八代文章空舊壘

九霄風日傍高臺金山路險舟重到鐵甕春深雁未回

時在京口猶

有龍眠松竹在白頭江上早歸來

朝登碧嶺雲低樹暮泊滄江浪接天廿載心情虛海月一春花

鳥亂人煙潯陽大隱思元亮天下奇才愧仲連擊柱樓頭吟未  
畢風吹斜日到前川

病中

數盡空堦落葉聲一燈高閣滅還明關河千里平生志鼓角三  
更此夜情月落餘寒侵客枕風吹斷夢出江城寂寥天末人誰  
問獨坐思歸計旅程

贈友人

楚水何曾住不流人歸東去恨還留他鄉風雨寒闌夢故里音  
書赴客愁送別峰頭仍舊侶醉眠江上更孤舟君聽洲畔三宵  
笛已是孤蒲八月秋

送陳大治歸里

歸鳥翩翩向遠岑送君風色動高林別離不灑窮愁淚倉卒難

爲去住心雲出孤峰瞻更遠江流幾處曲還深可知握手河梁  
意猶勝他時寄好音

贈張竹軒

湖海風多君獨游東南飄泊此孤舟山當斷岸迎兼送水捲寒  
雲咽更流永夜飛星疑近客高天落木正悲秋亦知前路饒知  
已別意難勝況酒樓

客路有懷

風煙三楚又三吳閱遍東南尙故吾竟使歲華消匹馬坐看霄  
漢落平蕪高原蒼翠浮空變遠樹家山入望孤最是早梅信寥  
寂西來消息至今無

詠古

秦時明月猶江海楚國荒臺獨雨雲千載高唐徒有賦一時詞



客盡逢君夢迷香草餘哀艷寂寞珠裳豈見閨湘水到今人弔  
古秋聲滿處雁離羣

九霄風勢急雲端獨客江頭立暮寒望裏關城迷近遠天涯故  
舊隔悲歡高秋尺素終難達永夜吳鉤且自看王粲東游信淪  
落早時已著漢廷冠

棲遲幕府仍年少蕭瑟梁園已暮秋吟罷山川歸夜雪夢回天  
地在孤樓風流際會良時事雲水蒼茫異代愁人世古今餘歎  
息不堪江漢日東流

六龍西幸終無恙五馬南奔竟不同遂使江山成建業更教花  
月照樓臺風吹錦纜雲邊出地劃天門浪裏開自古牙旗多重  
鎮上游須賴濟時材

畫閣凌煙起禁中傳聞上將已成功舉天鳴鶴希朝露滿眼哀

鴻泣夜風淮泗連年多異漲宣房無處覓遺宮捷書報罷來河  
警又送愁雲到海東

層樓飛閣出雲霄坐擁湖山笑六朝月好只宜京口樹夜寒不  
奈廣陵潮歌燈舞扇空顏色彩羽明珠且暮朝開府宴游盛賓  
客曲終斷岸草蕭蕭

### 客思

故山一望雲千疊勝地重遊客一身聚散風塵天惜別去來歲  
月草留春鄉心逢雁關遲早離思經年併舊新江柳莫催波浪  
急潯陽多有未歸人

### 重寄石甫

海雲西走日東昇粵國珊瑚見未曾風雨六年吾夢想文章一  
事汝情能路長骨肉寒秋夜天近星河到客燈歲久不歸應自

責昔賢負米至今稱

感士

更作何歸向北門客中風雨變晨昏摧殘霄路三秋志鄭重他人一飯恩游到倦時悲國士交從去後識王孫子雲寂寞終休怨舊日長楊賦尙存

咏史

秦皇按轡氣飛騰劍出雄關血色凝海外雲山驚虎視殺中風雨護龍興黃河入塞成天險白帝何靈有夢徵獨惜咸陽城畔月千秋長照漢諸陵

匹馬橫行古戰場重瞳勇略定危疆興亡事豈由豪傑優劣人徒昂帝王未必三軍心去楚無端一夕淚沾裳背關當日皆天意游子何曾戀故鄉

沛公王業起艱難馬上功成血未乾  
草野君臣原創獲安危骨  
肉各摧殘大風歌起關城暮  
故里雲空泗水寒不是婁生陳  
善策東歸誰復記長安

武皇遠略事陰山兵走沙場塞  
草殷百戰軍威揚海上幾羣天  
馬入雲間仙人飛閣高秋起  
使者星槎大夏還贏得近郊花  
萬樹年年春色滿函關

秋風搖落起河濱蘭菊芳殘見白  
蘋空有樓懸秦塞月更無人  
說漢宮春金盤虛飲三霄露  
王母曾邀九色麟畢竟劉郎真  
愛色重泉猶近李夫人

連天烽火自東來四扇潼關晝不  
開銅馬何能爭漢鼎玉衣無  
那暴秦灰雲盤河洛占王氣  
米盡山川識將才二十八人  
齊畫閣寒江獨抱子陵臺

詔申黨禁捕賢良冠蓋如雲氣不揚壯士有心除社鼠將軍無  
策引貪狼由來禁亂須當國自古強兵聚朔方竟使涼州軍入  
洛漢家宮闕委風霜

三分雄業各斜暉神器千年識所歸尚有魚龍思北伐可憐烏  
鵲又南飛銅臺春色知多少洛水仙人果是非惆悵黃初舊文  
物漳河雲暗雨霏霏

贈何雲衢

朔風飄渺起雲端昨向江頭報歲闌良夜故人貪話別高樓薄  
酒不勝寒心馳雲夢歸何日路隔衡陽第幾盤聞說飛鴻消息  
近故園應已問平安

詩情明月共梅花客思江雲又落霞幾日愁來如病酒一秋夢  
好不離家人言皖口猶歌管君到城南聽暮鴉不厭元龍湖海

氣三春同放白牛車

讀史偶懷

出處人才爭寸晷賢愚身世共風塵可能望外舒奇策不信天  
涯卽比鄰鞍馬驚心長路別煙花滿目漢關春賈生年少何多  
事獨向雲天淚滿巾

水決金隄路若何長天東望浪雲多空思賈讓呈三策誰見王  
橫鑿九河野曠黃昏盡烏鵲樓高白日見鼉鼉漢皇哀痛生民  
切一曲情深瓠子歌

軍書一夕達神京聞說孫恩入郡城海上樓船虛北向域中戎  
馬已南征關門霧重人晨伏水市風來客夜驚獨有會稽王太  
守高樓安坐衛蒼生

書後漢黨錮傳後

東都地亦號金湯黨錮人空國步亡一代雄名消板蕩百年喬  
木憶忠良驚呼戰馬來關外痛哭宮車去洛陽同是中州多難  
日流離獨惜蔡中郎

蘇武

聞道蘇卿塞上歸廿年家國事全非中朝望已歸司馬執戟人  
皆典繡衣都尉交情悲瀚海茂陵秋草泣斜暉白頭重望河梁  
路征雁蕭蕭向北飛

過左叔固舊宅有懷

西城舊宅傍寒煙灑淚重過不忍前三載樹陰猶日月百年心  
迹各人天高才寂寞秋風裊壯氣消磨落照邊宿草萋迷泉路  
隔題詩誰覓謝臨川

高談自昔吐瓊瑰剪燭西牕夜雨來白屋放交天下士青雲遺

遊洛陽才眼中喬岳人千古身後文章土一堆惆悵山陽聞笛處悲風颯颯起蒿萊

瑤臺

瑤臺高處彩雲封珠佩仙人立幾重七寶花開紅石竹九華香暖碧芙蓉金梭織錦霞初密玉椀凝冰酒正濃不比天台山下路劉郎且莫上遙峰

忽逐霓車入太清屏開初見遠山橫碧城露冷春難到紫館雲多月自明識曲真同秦弄玉步虛不學許飛瓊金鷄別後無消息腸斷天邊火鳳聲

寶璧成煙不待春徒令宵露濕芳塵絳河青羽無來意赤水丹霞有故身堂上虛巢金翡翠月中空泣玉麒麟天人化石千年恨欲學陳思賦洛神



若木枝頭望玉京拒霜叢裏憶瑤英空傳一顧傾人國未必三生有舊盟天遠難追丹鳳簡日高休問紫鸞笙明璫翠羽如歸闕可記江皋贈佩情

天孫機石恨雲遮龍女珠裳在水涯柳毅重來惟海月張騫初去有仙槎玉樓不種相思樹閬苑偏生薄命花尙有香煙千萬疊秋風吹散落誰家

回首瓊樓雲母車九天霞彩散華裾紫臺別久愁相見碧海情深故欲疎一自風前成野鶴錯疑地上食飛魚錦帆玉杵終拋卻莫道神仙不索居

離鸞有意發悲歌無那西風雁影多青女依然飛玉屑黃姑終古恨銀河他生春暖蘭香結此夕秋寒桂樹柯明月白雲天萬里欲浮楚澤弔湘娥

龍涎霽散翠微岑鳳腦光寒綠綺琴  
弱水三千舟去遠蓬山九萬路難尋  
瓊花豈是長生種菴草猶留不死心  
愁殺梁園詞賦客白楊風起罷登臨

呈謝楊柏溪方伯

九霄秋氣肅霜臺一日龍門破曉開  
知已驚從天外得芳音新自月邊來  
不圖草野邀奇遇敢說文名動上臺  
弱植愧非紅杏種豈堪移向碧雲栽

早歲牙旗出玉津使星東轉近高旻  
上游柱石推先達南國屏藩屬重臣  
報

主心懸三楚月憐才花發萬林春  
如何喬嶽凌雲漢也許垂青到部民

野草何知被曉曛虛傳驥子是龍文  
十年羞挾河東刺一顧真

空冀北羣未必斗間橫紫氣敢從天半附青雲賞音自古原難  
得高義終慚負使君

文章契合原千古霄路遭逢自一時豈謂舊題鸚鵡賦遂令春  
到鳳凰枝高軒獨爲王孫屈短褐偏蒙國士知報稱無由歸又  
晚空勞仙使下雲陲

送方夢松回桐

君乘亭畔五雲車歸探龍眠嶺上花念我江城猶落魄爲誰風  
雨怨啼鴉白沙洲近濤聲急烏兔山高日影斜此去故園空悵  
望相逢只合在天涯

晚飲瞿司馬署中

素羅香外赤闌干綠桂煙中碧玉盤四座高朋齊鳳舉一樽清  
露破奪寒夜歸蓮幕風初定月上梨花露已殘尙有畫樓西畔

散以徹亂雲端

孟塗前集七言今體律詩卷七

桐城劉開明東

懷江七峰

亦知公子最超羣一別江關思各紛  
風冷雁行疎白盡天高鷹眼露青雲  
艱虞作客偏年少薄暮懷人忽夜分  
轉恨燈前飛雨集昨來未與細論文

道中

秋高一鶚破蒼冥江漢游歸此再經  
樓近水天生夜白山開峽澗劃空青  
客中心事愁仍默馬上征衣看又停  
最是日斜行不進片雲風送度前汀

山中夜坐

黃昏涼籟起梧楸客散空齋笑獨留  
落葉秋聲穿破寺空山夜

雨撼危樓醉來意氣猶千古倦後心情戀一邱蟋蟀未須吟四壁有人似汝更多愁

楚中懷石甫

越王城畔楚山陽兩地昏晨各混茫月併珠光搖岸白沙乘雲氣入天黃瀟湘水草無文藻嶺海煙花自色香久客不堪歌舞處聲華矜惜少年場

煙霏暗樹更江潭落日連波影共涵絕壑雲根多濕翠高岡風力斷飛嵐一身探勝來天外五載相知隔海南獨上高樓驚別久幾時霄漢看迴驂

席上偶話程觀國感而有賦

白雲樓共碧蘿村雨氣飛來近客樽隔水青山遙抱郭背人老樹獨當門濃陰秋色分朝暮遠近親知卜去存痛惜程生今五

拚舊時笑語未曾溫

示蘇生庭春

昔年問字愧門牆師弟情從別後長似汝才華宜貴顯古人能  
事豈文章孤懷爭路先鵬鶚一骨當秋望驕驕努力天衢騰絕  
足風雲吾已倦登場

贈龔冲泉贊府

豈有青雲鬱不開劍光黯處隱龍雷五年勤苦原王事千里馳  
驅困吏才感嘆逝波催日去蒼茫秋色向人來可憐天馬飢何  
用一顧難償伏櫪哀

雲中飛錫久宮刀天外殊榮自節旄大府勲名原自易小臣微

賤敢言勞

君詩有小臣勞苦竟何裨之句

由來霄漢鴻毛重那有沙塵驥足高

去住連宵籌未穩豈關情思怯風濤

已識人間行路難當年底事上長安枕邊河海聲猶在卷裏風  
雲氣尙寒失意更憐人作客多才真恨汝爲官卑棲亦負蒼生  
望珍重仇香作鳳鸞

聞李蘇門病目感而有賦

也曾當日遇孫陽如此勲多竟不揚從古奇才皆抑塞到今故  
老望循良誰將苜蓿餐騏驎人惜荆榛辱鳳皇不謂窮愁身又  
病天高欲問轉微茫

健筆陵雲氣久騰才高易被俗人憎空聽紫塞霜前笛曾渡黃  
河雪後冰壯士豈堪疲道路少年深悔負賢能金眸玉爪吾終  
惜何曰秋風起困鷹

城上秋陰曉未開縱談猶憶共高臺經過戎馬餘豪氣識得元  
龍亦霸才迺服未能君莫嘆相思不見我徒來斜陽又下章門



樹爭使英雄志不摧

孤桐墜葉已南州日暮秋心感舊游仕宦能貧真我輩風塵失意作名流飄零文豈遺青史偃蹇官慙到白頭困躓不須頻自惜古來李廣未封侯

竟遣麒麟地上行一官真共水同清遲迴白髮來時意棄擲紅顏別後情生子早教窮典籍有田何必羨公卿深交不作尋常語長恐相知負友生

寄許竺谿

沙草茫茫夾路飛天涯累重此身微十年詞賦爲人役半畝園林待客歸壯興夜飛迴雁嶺鄉心春落釣魚磯篋中舊有英雄記檢取殘編付落暉

送錢芷汀四丈歸滇

梧桐葉落影娑娑萬里征帆下碧波江上寒煙歸路遠天邊明月缺時多梁園池館驚秋早庾信文章奈老何今日雷陽亭畔酒爲君重唱渭城歌

休向瓊臺賦子虛人生只合故園居白頭不問王孫路赤手能迴帝女車燕市客遊悲宿草襄陽宦迹付秋蕪如今歸隱青山去萬樹梅花認舊廬

華胥夢斷暮天昏馬角牛童不忍論碧海多年人路阻白雲一片客心存少陵勲業悲明鏡南阮窮愁飲巨盆辭別雷川莫回首秋風先已到柴門

悵望滇南日又紅飛來山翠入微濛火雲壓地無秋色雪浪盤空有夜風四海交情離別內半生踪跡畫圖中他時獨剪西窗燭可記東吳一阿蒙

別冀丈葯林

野色昏昏望未開此行何處更銜杯  
大江不語人離別明月無聲雁去來  
作賦十年仍異地相知滿眼獨登臺  
逢君莫說生平事自古乾坤肯負才

寄陳大治

曉日微風又路隅瓊枝渺渺隔青蕪  
別來夢到江頭早歸去花開嶺上無  
同學幾人如俊鶻少年羨子是名駒  
表忠觀外蕭蕭雨記否城西舊酒爐

偶成

白楊花落雨紛紛客子依然渡水濱  
恨別身猶棲幕鳥思歸心似入山雲  
天連芳草三吳遠江濶斜陽兩岸分  
我醉登樓歌舞鶴無人知憶鮑參軍

送史友鶴赴山東署中

當時返旆自黔州行盡南天萬里流  
沽酒曾邀滄海月題詩獨上楚江樓  
何期野鶴歸林後又逐雲鴻去嶺頭  
此日樽前離別意隨風吹度綠楊洲

故人多半隔天涯又見君浮五月槎  
海岱幾人看駐馬淮徐他日計迴車  
河邊垂柳催征客天際晴雲雜斷霞  
濟北江南非萬里可教驛使寄梅花

漫興

豈無蓮葉濟滄波奈此涼風欲起何  
千里白雲秋色遠四山紅樹夕陽多  
空思陌上花如錦又送天涯客渡河  
回首故園愁歲暮那堪征雁復南過

卽事

大江東去碧天寬天際蒼茫路幾盤月影夜隨河漢轉雁聲秋  
入水雲寒孤城有客談開府三楚何人慕建安可惜青袍舊年  
少側身江左愧儒冠

道中有感

久別何知歲景遷且看霜葉過寒川山離客路重重背天到池  
塘面面圓遠浦暗時生暮色疎林盡處有人煙關河望斷西南  
信八月秋風雁未旋

客中

臨風不敢上高樓異國雲山入望愁千里壯心長劍外一春鄉  
思大刀頭銀屏繡鳳開歌館金錯盤龍出畫舟誰識刺桐花外  
客坐看孤月照簾鉤

過三江口

本是人間一釣徒願游南越與東吳泊舟夜聽三江雨搦管晨  
披五嶽圖斷壑風微雲影定高秋月落楚天孤明朝挂席潯陽  
去何處青山問鷓鴣

江上

予愁渺渺涉江河心欲高飛阻逝波南國有芳曾手折東方未  
露且顏酡醉看落月崇蘭汎歌到秋風白芷多起舞臨流問舟  
子玉衡低指夜如何

感事

應如恍惚駕雲來帝子乘波逝復回蘭若香多宜結帶芙蓉花  
好不爲媒朱塵潔室無神御紫貝爲宮待日開亦有靈衣從水  
殿隨仙馭逐風雷

我駕飛龍覽八方青雲衣共白蛻裳靈芝別主難爲秀衆草先  
秋惜不芳葉落有波生鄂渚雁飛無雨渡瀟湘西皇若果憐長  
別莫使涼風到故鄉

木蘭

木蘭墜露不堪餐旨酒高臺宴盡歡  
砥室夜長思待曉羅幃秋薄易生寒  
素榮有葉棲靈鳥碧樹無花食彩鸞  
惆悵軒車今不見元雲飄落自江干

言懷寄左筐箴

遠游猶自立中洲芳澤難捐爲好修  
居本瑤臺輕下女行迷雲路恨高邱  
風光搖蕙疑靈降日夕懷椒爲水留  
歸鳥致辭情未極無端遐思在方舟

華苑

華英玉色隱雲東春不余知歲又窮終古蛾眉徒掩涕生來鳳  
翼豈由風一作可堪蟬翼亦乘風心愁黃棘連江上目極青楓被路中修  
闕綺瓊齊飾徧芬芳誰是舊朱宮

感見

有女鳴環過水湄德音方去使人思華容欲接嫌辭弱淑問初  
通懼日遲秋露爲期留玉玦春陽先戒折瓊枝雲旗來往長相  
護卻笑鸞皇遠未知

聽歌有贈

層軒離榭曲池邊瓊木爲籬鎖蕙煙已使華燈爭素月忍令修  
幕隔朱筵歌能秀發偏教緩心欲相親未敢宣我是湘南舊公  
子芳蘭有怨待君傳

秋閨



欲偕予美共三秋角枕驚寒命不猶蔓草有情懷道左好風無  
夢到河洲不辭多露勞瞻望敢對他人訴隱憂莫爲敖游思遠  
出汎舟自古怨中流

客思

城隅月出照西方我獨南行怨路長華落好人空結佩秋來公  
子恨無裳三年舊宇懷謖草八月西風嘆女桑竟夕未遑聞鼓  
瑟不堪蟋蟀在空堂

寄懷陳大治

風雨瀟瀟薄暮心興言空谷與中林邱田采葛須行速江漢方  
舟莫就深春酒聊爲今夜樂秋蟲猶記往時音瓊英惠我終遲  
報坐待茗華落到今

星言

星言今日向周行我馬秋深畏履霜楊柳豈宜生曠野梧桐悔  
不託高岡白雲澤已零鴻雁黃鳥音偏效鳳凰歎息東門沉燕  
處錦衣舞罷北風涼

漫賦

只合空山賦白駒誰令高閣坐青蒲入籠我自憐鸚鵡對酒人  
偏唱鷓鴣千里西江虛汲水三年南郭悔吹竽題詩欲倩長康  
筆爲寫龍眠聽雨圖

喜晤韓二

恐別天涯不識春乍逢疑是夢中身一時驚喜忘相問滿眼風  
塵認未真芳草有情斜照晚青山無恙月華新挑燈且盡中宵  
話明日江干少故人

攝山幽居寺

連峰中斷見禪林修竹重重起暮陰曲徑到時黃葉滿枯僧坐  
處白雲深幽花古洞非人世止水空潭淨道心尙有靈巖探未  
盡石門霧鎖已難尋

卽事

落葉蕭蕭下古邱人家遙隔楚江流雲無定影朝穿牖樹有殘  
聲夜語秋半載心情愁北渚一城風雨對西樓蓬萊仙闕分明  
是辛苦劉伶作醉侯

過姑塘

大姑遙立聳雙鬟青入湖波曲幾灣過眼不知雲外鳥回頭難  
別岸旁山野花含笑迎人至流水紛馳浪客閒不是倦游竟忘  
返歸心只在近鄉關

送萬香海中翰歸真

西園公子舊多情紅粉驚狂識姓名一曲歌終雲乍轉三春宴  
罷月初明黃金臺上功名薄白玉林中山嶽傾去入滇池秋未  
老羅塘更聽夜猿聲

消盡瓊漿擊玉壺歸心先客渡江湖寄言城畔千家月好照雲  
中十幅蒲吳楚煙光非故國西南秋色在前途從今別卻潯陽  
去莫更回舟望小姑

臥聽江聲到枕前起看曉色上層巔莫愁萬里天如水自有三  
秋月滿船落葉偏飛人去後歸雲欲共鳥爭先別來恐憶吳娘  
曲記取江南暮雨天

志感

珠箔驚傳冷夕暝葛絲曾近北堂萱自嗟蘭閣逢知己泣向蓮  
臺憶舊恩座末綠衣憐杜子淮南白粲奉王孫誰知繡幄春如

故環佩聲沉月下門

鵲臺風冷七香車鳳嶺雲迷五色霞  
來是人間紅杏雨去爲天上碧桃花  
金環寂寞羊權室玉簡飄零張碩家  
賴有堦前珠樹在他時春暖發瑤華

紫錦紅羅鎖故邱芳心已共水東流  
可憐曉露生衰草從古名花困早秋  
楚渚雲消鸚鵡泣秦樓月落鳳凰愁  
早知此別成千載悔買江頭竹葉舟

贈客

長江春暖水生煙塔影中流日夜懸  
人向高樓歌楚曲雁從遠渚入吳天  
殘花有意飛前席落月何心照別船  
一出汀洲維北岸四山無恙草芊芊

贈汪從垣

急流吾自買歸舟落葉驚心古渡頭白露下時猶中酒黃花開  
後尙餘秋已欣車笠逢詞客莫道雲煙屬醉侯河上玉驄須小  
住滿天細雨濕松楸

次方六夢松踏春韻

平野林低鳥下遲酒旗輕漾水邊祠風催萍葉追帆影浪湧桃  
花壓釣絲路覓王孫初去後詩成燕子未來時君看陌上春多  
少不是東風總不知

孟塗前集五言今體長律卷八

桐城劉 開明東

奉懷姚姬傳先生三十四韻

海內誰知已名山有達尊一星臨楚越萬水祖崑崙碧漢雲英  
在丹霄月斧存銅龍承帝子金馬薄公孫筆挾江濤轉牋隨石  
雨翻五音窮正始萬籟鼓朝元上相方推轂西曹且叩轅青春  
辭漢闕白首臥梁園每惜微言絕新聞異學喧有誰探義窟獨  
力闢詞源障海迴狂浪披雲出曉暄高文流上國大雅起中原  
士盡歸羊陟人爭謁謝琨斗南雲四集天外鳥孤鶩美壁登元  
圃名駒出大宛不才甘短褐自昔賦高軒倚篋無長劍開筵有  
巨盆幾年求鳳藻一夕造龍門已倒中郎屣曾傾北海樽枯林  
承露澤寒谷轉春溫皖口人文地瑤壇雅頌墳追隨窺奧府汲

引荷高言共說師韓愈何能作李渾錦筐收木屑金錯劈雲根  
寵惜空羣驥咨嗟失水鯢親真同骨肉誨不問晨昏豈料元戎  
幕遙馳建業幡時鐵制府延主錄山書院書來桐子國人去謝公墩日月無  
常處乾坤入舊垣靈光猶在營趙壹久思袁雲路終蕭瑟儒關  
尙討論自慚非絕足何以報明恩采鳳猶思附潛蛟出莫援側  
身瞻泰嶽感戴倍何蕃

述懷寄陳大治

海宇紛文物英靈尙草萊古今同感寓吾輩恨多才出處乾坤  
共寒暄日夜催賢豪今雨散意氣昔雲開卑論猶千載沉吟尙  
九垓極天惟曉日倒峽走驚雷雲物歸懷抱江山落酒杯碧虛  
看石轉清漢自東回司馬游初倦揚雄賦久裁出塵皆鳳藻驚  
飛見龍媒共吐風霜氣爭傳錦繡堆一時稱絕足謂左筐敘光栗圖張小阮



獨步幾高臺感舊雲生楊懷君露滿苔孤城天半落  
角夜餘哀桂樹秋同病梅花雪壓酷何時數晨夕對我劈瓊瑰  
夢想徒雲樹文名自斗魁彩毫吟未畢江月正南來

再呈姬傳先生二十二韻

浩蕩終何極千秋繫一身斯文信寥落此意未沉淪老去文章  
在歸來林壑親鏡猶懸白日斗已挂蒼旻並轡無前哲登龍盡  
後塵天心留碩果物望屬斯人好古空焚鼎憐才辨玉珉十年  
求駿馬一顧得真麟太息黃香少深悲仲憲貧門高容立雪海  
濶許登垠強欲攀千仞何能舉百鈞名山聞絕響近代睹先民  
聚散時難必關山月又新短衣雷水北孤棹楚江濱得句疑風  
雨高歌對鬼神鳴鸞心不展野鶴性難馴逝景悲西陸危樓近  
北辰可堪非故里況乃阻青春天外宮牆遠雲中車馬頻一經

虛授受三楚各昏晨曠世才何異空羣識自真長江千派水終  
幸出西岷

將歸呈師荔扉先生二十四韻

天地空搔首江關尙此身七年事行役一劍走風塵壯志羞趨  
俗虛名不濟貧馬卿空去國王粲悔依人碧漢迷高岸滄洲隔  
去津前途尙寥濶早歲已艱辛草野經綸拙東南景物新煙花  
爭繡壤日月在朱輪身世憐飛藿才華嘆隱淪地應嫌久客天  
不棄儒巾邂逅逢知己雄奇絕等倫長河波浩渺喬岳勢嶙峋  
鳳錦當空出龍梭隔座陳雲煙千嶂掃風日一時親遇合非無  
數文章信有神人皆憐捷足公獨惜潛鱗惠我殊常格論交見  
性真縱橫雲滿座談笑谷回春已下陳公榻何如孟氏鄰秦松  
依峻嶺楚劍倚高旻謬許人中傑虛推席上珍不才懷舊勉欲

去又逡巡國士恩偏重雲霄意未伸可能千里馬終作九真麟

呈學使潘芝軒少宰一百韻

春降南雲外天垂北斗邊  
早時卿月出昨夜使星懸  
鳳羽來雙闕麟文照八埏  
聲華仍海嶠地望已樞璇  
澤守黃門舊恩分紫禁偏  
天官隆寵錫王國重衡銓  
朝有圭璋譽賢原柱石堅  
丈三高見日尺五近連天  
建幟華林動登壇肅命虔  
九霄歸玉斧三楚入璣璫  
自昔多奇藻懷才正少年  
七襄雲錦麗五色露華鮮  
庾信鴛鴦賦王筠芍藥篇  
神蛟藏不測奇驥突無前  
白日懸名早青雲得路先  
怒飛程九萬同試客三千  
獨冠賢良策傳聞禁苑仙  
王曾登上選梁固已高騫  
旌節花真貴文章樹正妍  
黃金臺上馬紫玉殿前鞭  
絕足何輕捷乘時尙勉強  
旃風期千日會遭遇

九重憐

帝識黃香少僉推賈誼賢朱霞天半見

紫誥日邊宣命許瓊臺直秋高瑣院眠夜聲猶玉佩曉景且花  
磚

詔試金閨彥羣分錦水箋盈廷皆玉立得句走珠圓鰲背誰超  
出螭頭闕巧儼人才真似海公筆獨如椽豔奪雙花錦精同百  
鍊鉛遂能超紫極不次起丹田

勅自鸞坡下官從鳳閣遷朝回驚玉李燭到認金蓮日月開文  
苑星辰傍講筵勞光猶北燭寶氣久東纏願紀黃龍瑞將成白  
虎編新詞存月旦舊典識坤乾露染金壺碧霜凝石硯元有書  
稱鳳翥偶爾學鴻翩華屋樽前出名流海內傳驚人如玉檢贖  
代寶珠船文物紛歸眼雲霄又並肩絲綸頒少宰臺省掌官聯

三選分流品千秋此吏權蔡侯新就拜毛玠始騰勳曾領金

粟兼司玉府錢得

君原異數秉政未華顛吐納歸堯典謳歌侍舜絃雲隨天左

海與地回旋獨步臨黃道三臺近紫躔朝衣親

御氣香霧見靈誕掌上仙人露池頭玉女泉由來承賜渥自此

得春延契合青冥上崢嶸太華顛致身初鶴鶴轉盼已貂蟬感

激風雲氣飛騰翰墨緣南宮持鑑久北闕奉書遺鐵網深離岸

冰衡遠映川廟堂崇典則江海滌腥羶銀榜皆瓊筍金花擁玉

璽一時尚合浦五瑞出于闔桃李門庭大芙蓉甲第連得人榮

漢闕報國尙儒璫大厦須梁棟中朝更柏樑八方瞻鼓鑄萬象

受陶甄昨捧錢唐節遙馳使者轡東南收竹箭雲雨挾楠梗滄

海潮頻聽西湖月可舉幾人如鸞鷟兩度起鴈鷗岸樹紅深淺

沙堤翠婉嬋望餘山窮窅吟罷水潯浚勝地才能副文臣任獨  
專瓜期遲去越杏雨且臨燕朶殿承鸞詔華房奏鶴笙西江旋  
秉鐸南楚又持鍵風動朱旗捲霞開絳帳褰五雲思鐵鳳十月  
振風薦春信梅花嶺晴光桂子驂詞條高出地學海淨無煙多  
士求心得諸生仰腹便大江歸策府此日見金淵自顧慙形拙  
當時恨尾邇雲根徒自琢月齋爲誰穿白玉函能讀青瑤字可  
鐫梁園曾倒爵開府舊憐蛇草檄風先起爭春火欲然孔融奇  
一鶚楊震少三鱣踪跡同浮梗生涯類刻肱蒼虬吟海迴赤鯉  
嘆庖捐空自爲齊語何堪效李娟星芒藏劍鐔雪色隱戈鋌故  
國經秋隔寒芳帶露蠲佳人悲蕙芷公子惜蘭荃雲水愁難卻  
煙霞錮未痊不爲千里客安值九方歎山自宗恒岱河應納澗  
源舉天思薛燭今代識娟娟星漢何能步虹絲未易尋珊瑚枝

十萬獻到海東全

留別龔西原太守二十二韻

不謂家山外新交得故知游慚三楚拙見恨十年遲章水論文  
地霜天攬袂時鯨魚吹浪息鸛鶴唳雲悲冰雪當軒出星河入  
座移吐辭才似錦懷舊鬢猶絲昔發雲中騎曾看嶺上枝一麾  
新出守雙旆忽高陲嶂挾青雲起天從碧樹垂下車同渤海快  
劍劈琉璃春布梅花國秋開竹葉卮憐才親白屋有客識黃鵠  
五馬何謙退羣龍盡繫維放懷天曠遠吟嘯月來窺故事歸民  
望風流亦我師文章通感召意氣忽相期遂有三秋契能消萬  
古疑乍逢雲幸睹久照鏡忘疲汲引高風舊開誠宿霧披情真  
憐紫燕力欲起丹螭霄漢人難別江天迹又離茫茫東去水猶  
自戀崑池

留別李蘇門贊府兼示沈文浦二十二韻

湖海飛騰氣風塵落拓軀不才同潦倒此別獨艱虞一望吳山  
隔相逢楚水俱笑談忘寂寞杯酒共歡娛似我三冬況憐君百  
里途卑棲偏下邑壯志本高衢文彩千金璧聲華徑寸珠雲深  
迷翡翠海濶隱珊瑚感嘆王孫飯殷勤玉女壺艱難仍好客脫  
畧不輕儒萍水情偏重雲山興不孤高鳴猶老鳳獨出羨名駒  
謂雪沈約嘗同調謂文劉琨未異趨縱橫論治策契合動星樞  
況有西園轍謂龔愛聽南郭竽華燈開綺席高館咏行厨文物  
風流會涼天聚散區性情原日月踪跡且江湖帝子今誰覓匡  
君尙欲呼買舟將進發把袂更須臾客路風千里交期海一隅  
從來惜離別原只在吾徒

薛麟王閣西竺寺贈劉生雪盃兼示張介石



曉色連何處蒼茫此際心乾坤方浩渺身世獨登臨高閣淩清  
漢名園傍翠潯煙雲寒更迴石徑曲還深豈有芙蓉檻徒餘竹  
木陰風流久搖落名輩亦消沉懷古高人榻尋幽野寺琴客來  
初變響曲罷有遺音攬趣何多事同游豁素襟曠懷天共日抗  
論古猶今年少人如玉詩成字擲金已窺銀海浪更步玉山岑  
遠想橫空濶疎狂且自禁汝才能秀發吾意不孤吟游覽窮南  
浦晴光又北林飛沙人袖落空翠晚寒侵遠認雲邊樹鳴知岸  
外禽一川爭鼓盪萬籟起蕭森促去情猶戀歸來酒并斟好留  
鴻爪還付與暮雲尋

寄懷張小阮二十二韻卽送其公車北上

聚散真無定關河又腐儒才名吾共汝心事楚還吳遠隔浪千  
疊相思天一隅奮飛愁竟夕攬轡且前驅風急聲爭樹城高影

浸湖亂雲穿石骨寒露逼人膚四顧峰高下羣流浪轉輸沙從  
荒岸起月向隔江呼天地餘蓬鬢風波困釣徒生涯憐計拙景  
物笑人孤梧竹三霄蔭珊瑚百尺株昔年同此志失路負微軀  
際會雖關數升沉各異途春誰分近遠樹自見榮枯海岳求新  
雨山川憶故區迢遙京口笛蕭瑟白門烏別意愁金管冰心冷  
玉壺九臯猶記鶴千里竟騰駒詩已揮珠玉論休識砭砭抗懷  
須古昔有客尙泥塗風義千秋並交情十載俱長安知日近珍  
重

帝王都

卽事書懷

直欲乘風浪南窮粵海頭遲迴天萬里悵望月三秋去住憑長  
劍行藏問釣舟因人成遠別有客笑遨遊共嘆黃金賦同傾碧

玉甌少年皆駟馬今我尙江洲地潤青山迴天低碧漢流波空  
雲影失草沒露珠浮勝景原初遇名園已再留盈城誰舊雨映  
日盡高樓盛宴多賓客微名附斗牛選歌傳弟子作賦動諸侯  
席上無紅袖花邊半紫騮夜寒生寶瑟哀怨起靈修彩幄花爲  
樹明星火作毬興關涼月落人散彩雲收樂事推靈運傷懷自  
馬周拔刀悲趙鐸解帶惜吳鉤望氣知埋獄能言未解咻已將  
辭北海深悔卧南州飛翠隨人至寒霜益旅愁浮沉空野鷺浩  
蕩逐沙鷗岱嶠終思到蓬萊尙欲求釣鰲有虹線不向大江投

再寄陳大治

相馬風塵外論材宇宙間斯人偏草澤往事久雲山遠記游時  
跡寒驚別後顏孤懷仍不展前路竟誰攀海上青鸞伴天邊白  
鷺班相攜高閣迴坐對野雲閒星月邀同住笙歌宴未慳醉忘

猶爾我夢醒各江關信遠望頻寄詩多憐獨刪故鄉何客到京  
國幾人還劍冷青雲氣刀寒紫血斑早時悲折鏐終夕聽鳴鏐  
殊賞因名累高才信世艱賦憎王粲好辭恨左徒嫺湖海情原  
薄山林性故頑與君同夙志誰分困塵寰江水流三折銀河曲  
幾灣相思深不隔天半語孤鵬

南州客中有懷舊游寄左孝廉篴光庶常栗原張孝廉  
小阮姚進士石甫四十韻

不挾南遊策安知楚越遙人生原泛梗歡宴敢終朝玉宇驚搖  
落瑤琴久寂寥真心吾土木得路爾雲霄四下同登選諸侯早  
見招時石甫方赴粵東百制府之招姚光方騁足張左亦連鑣特出名無負離  
居恨未消才華空草野心跡自漁樵憶昔追先典相期出世驕  
有懷抱冰雪得句走瓊瑤幽欲愁山鬼高疑拂斗杓爭傳名驥

出齊嘆阿龍超視北書千軸天南酒一瓢縱談河落坐起舞劍  
橫腰意氣原千古遨游感六朝大江曾泛月建業共聽潮高館  
朱霞起華筵絳蠟燒一時初進酒兩岸盡吹簫彩樹光偏滿流  
珠影欲跳看人贈香草獨自拾芳椒懷舊探溪曲尋源到板橋  
歌樓半零落舞扇早蕭條露洗胭脂泣波流翡翠漂鳥呼奈何  
日月是可憐宵勝景知難再吾徒與尙饒鸞文騰白雪蛟雨灑  
紅綃自謂窮佳日那知觸迅飈天高嗟霧隔人散各雲飄蘭向  
霜前悴桐從燹下焦南州愁客路北郭聽芻蕘海鶴誰能畜天  
龍我欲雕三山舟不到五嶽筆空搖感嘆陳蕃榻淒涼季子貂  
一秋悲獨處兩地此無聊不惜相思苦惟期令德昭情雖同水  
月思已極歌謠紙貴元戎幕星瞻使者輶虛名空物望前度憶  
風標大雅今誰繼此心寒不凋終須到霄漢九奏續簫韶

自南州回星渚留別鄭夢白明府二十四韻

竟向何人語歸心落暮雲寂寥天並水容易我離君早歲相知  
久斯文屬望殷論交空八極數典起三墳獨劈丹霞錦能書白  
練裙才原奔萬馬氣已奪千軍天漢通雲路花城傍水濱湖山  
欣得主草木被餘芬風雅歸衡鑑淵源溯舊文謂義門文集有詩如  
鄭谷下第惜劉蕡共飲娛清夜高歌遏紫雲明珠從海拾廣樂  
自天聞九疊匡廬秀三霄景物紛吟成憐共賞宴罷笑微醺虛  
室頻生白新絲未染纁徒勞千里目喚作五花紋白日名難副  
蒼生念已勤治真同鄴水學更愛河汾月窟想誰躡星田待共  
耘昔曾逢鮑叔今尙愧羊欣上客筵初散南州硯欲焚別來才  
幾日歸去又斜曛海內奇材少天涯此處分紫鸞與黃鶴同是

寄懷王賓麓先生

滄海流無際吾鄉自典型  
眼青惟國士頭白抱遺經  
出地宗峨岱羣流別渭涇  
有聲騰北闕壯氣絕西溟  
筆落風兼雨詞傾峽走霆  
中郎碑可識太室鼎能銘  
自是珍和璧何由貢漢廷  
一官心不展千里步終停  
苜蓿餐空飽蘭蘅鬱不馨  
鄭虔才獨絕屈子恨徒醒  
臺省諸公在鈞韶此處聆  
士林存碩望江漢惜英靈  
在昔棲雲閣涼秋見德星  
綠天曾共處白雪許同聽  
每嘆霜寒匣深嗟刃發  
硯論交原白日結契久蒼旻  
別足空憐驥關心問聚螢  
笑談成往迹離合總流萍  
賤子瞻喬岳先生納寸莛  
斯言豈河漢吾道未孤零

送湘艤明府之天長任五十八韻

璧曜輝神縣雲英起大荒  
蜺旌懸上國龍節鎮南方  
擢吏思荀

藐安民憶李常時方占利涉公乃接明光早歲窮維帙崇情圃  
翠璫玉川原愛博子幹獨懷芳犀角爭春碧松煙灑硬黃瑤華  
凌六代鳳藻邁三康筆海真無忝戎韜更擅長將軍虛左席幕  
府下飛章因別笙歌地遙經汗馬場義山隨節度常侍適荆襄  
太乙軍中識靈虹帛上揚入參司馬法出視羽林郎決勝能千  
里從行越九岡佐平秦郡縣永固漢金湯元老嘉籌策星書達  
聖皇卽時霄路啟獨壑霧鱗翔周室登賢宰吳都出智囊揚休  
榮殿闕奉命守桐鄉廣廈周桑梓陰崖見斗筐銅章新令尹墨  
綬舊循良自有花堪種寧徒刃不傷冰壺含皓瀟銀薄照虛堂  
好士同青軸憐才勝赤璋高衢張鬱鬱大野熟龍驤衆派歸淵  
府公庭坐鼓簧董韓容騁足嚴樂盡伸吭正荷崇花骨何期詠  
葦航王喬辭鄴水潘岳去河陽北陌鴉鉏輟東郊蝶局張諸生



攀夾鼓父老送歸襄

朝命褒朱邑恩榮徙石梁  
節樓仍奉檄雕甍又鳴璜  
鸛鶴棲新舍鷺鸞復故行  
聞風增曲踊顧影自回惶  
羈貫輸麟質芳紳結蕙纒  
窮經空秘閣作賦擬長楊  
臥只懷山桂顛原號海棠  
中洲求宿莽大澤絕飛艎  
幸與金仙遇曾將玉尺量  
初逢憐范叔再見識文疆  
謂我持雙管凝鋒鬪七槍  
神香高蕙芷天籟協球鐙  
六律吹寒谷三雲煖曲廊  
并刀生雪鐸越戟起金鉉  
絡地繩雖設垂天翼未颺  
何能酬伯樂只自愧干將  
幾度南州榻多年北海觴  
戴靈心激烈瞻斗氣昂藏  
今值征帆發遙看曉色蒼  
風催香案吏人踏素娥霜  
言自蓬壺北將循泗水旁  
廣陵行可接宿豫渺相望  
錦蓋明江日金鳧度女墻  
地猶三楚境官卽萬夫防  
知已關城隔慈君雨澤滂  
懸知徐子國青鹿下高塘

孟塗前集五言今體絕句卷九

桐城劉開明東

題剪衣圖

取彼蒲桃錦裁爲衣與衾不須問刀尺長短在儂心

閨情

亭亭嶺上枝云是相思樹誰使雙鴛鴦飛來不肯去  
寶瑟欲生塵空房不覺春玉顏久憔悴羞見鏡中人  
昨日君書來云歸到江渡遣人去江頭不知可相遇  
望望君不來庭前花又開驚風響簾幙獨坐生疑猜  
非是妾心疑君來何太遲願爲江畔月同郎並馬歸

靜坐

寶鼎香如故堦前寒暑移我心旣已寂衆籟欲何爲

休說江波濶徒驚湖水平取來置瓶內風浪不曾生

古意

妾家傍江渚門對水西頭不解江何意朝朝東向流  
弱柳啼朝鴉高樓映晚霞路旁人不知呼作莫愁家  
樓下有芳池花飛不知數君看水苔香是儂浣衣處  
繡幄垂琅玕瓊漿進玉盤夜來人坐久從不識春寒  
南陌飛游絲搖蕩空中霧風起不多時已過門前去  
採彼陌頭花看君乘寶車尋芳到何處春色在儂家  
將儂明月珠飾作同心結解與君佩之長年不離別  
小妹年十一顏色亦如玉夜夜畫堂前學儂理清曲  
昨日和風至櫻桃花下游問我中何恨臨風長淚流  
殷勤向妹言汝且看春樹阿姊無他愁只爲春來去

連步至池塘微風送遠芳臨池莫輕語中有睡鴛鴦

有懷

好鳥鳴朝陽微塵滿路旁幽蘭處深谷衆草難爲芳  
古柏垂高原挺龍凝曉霧自知無好顏不敢生當路  
迢迢歲將晚渺渺秋怨多持此懷人意因風託遠波  
靜坐世情疎起看星漢轉孤雲天際飛漸與此身遠

宴集

璧月揚寒光銀燈夜未央彩雲知我意不肯出雕梁  
今夜且盡歡寧知遲與早侍兒不識時乃報東方曉

閨怨

妾有連枝草珍同瓊樹柯孤芳不見賞門外露華多  
解下青珊瑚收來明月珠自從君去後不著合歡襦

取瑟向風彈悲音當戶發恐君不我懷且復置巾篋  
浮雲隨北風飄飄何日返不惜妾身孤悲君千里遠  
寸草附喬林誓不因時異存此三冬心待君百年內

擬古

儂家金盤露味勝新豐酒郎今飲此杯尙憶長安否  
郎望江南山儂思江北信彼此相憶情今宵且莫問  
爲郎再三歌好解此心曲儂家晝自長不須早燃燭  
新製鴛鴦衾九華發光耀郎如欲看時持向燈前照  
門外卽新河春來煙漲多比郎故鄉水深淺當如何

偶成

日飲長江水誰知江上心煙波渺無極只爲別離深

出郭

步出北邙山白楊風滿地古之傷心人曾於此墮淚

採桑詞

灼灼深閨女採桑南陌頭回看來處日已到東家樓  
他日繭中絲卽此桑間葉春蠶有何心纏綿能不竭  
纏綿自一時宛轉憐柔枝採時人不覺葉葉有春思  
左捲紅鸞袖右舉白霓裳風來未及採吹落滿銀筐  
憶昔採桑時柔條拂地垂今來攀折處仰首望高枝  
將桑比垂楊更是多情樹掇罷有餘思提籠不肯去  
行行城南隅獨立忽躊躇夫婿在何處空羨秦羅敷

山行

終日在空山不知山下路前林有大聲應是人行處

偶成

亂鴉喧古徑返照入空林四顧無人識白雲知我心

採蓮曲

儂家石城西水繞橫塘路溪上諸女郎相邀採蓮去  
言乘青雀舫湖深煙水多蕩槳中流處寧得無風波  
蓮花何灼灼出水清且鮮人心與花意看取秋風前  
採採不盈筐芬芳滿江水長恐早寒生羽謝湖心裏  
雲帆半面張影動水中央久在花深處風來不覺香  
荷衣映日鮮湖水清如許戲水見鴛鴦低頭默無語  
煙光散碧波花氣蒙空晝採得並頭枝偷置紅羅袖  
取水滴荷上點點成明珠持比花間露得似此圓無  
終日戲蓮花蓮心紅見底懷之可宜男不願遺彼美  
笑語入花叢斜陽照獨立貪看水生紋不覺羅裙濕

不見煙中人但聞花內語暗指莫愁居相去只尺許  
阿嫂弄蓮房小姑愛蓮子芳心不自持搖蕩風生水  
來時結伴人穿花又相遇日暮西風生好趁晚潮去

幽居

幽徑翠蘿深苔痕青未掃春來人不知已綠堦前草

獨坐

兔月未生時羊燈初卻去借問庭前花瘦影歸何處

春閨曲

繡閣復重臺春寒帶曉催闌干深深曲曲向儂迴  
今日深閨裏爭言芳思多起來問梅樹昨夜夢如何  
衣淡暈微碧酒酣顏半紅郎前嬌怯慣不肯立東風  
妝成每自矜容華稱獨絕恨殺小桃花與儂同一色



好鳥對春風朝朝言不足阿儂自有心恐郎或未識  
微雨近清明人家呼賣酒生平恨別離不看門前柳  
東鄰小兒女昨日往前林未識溪頭路落紅何許深  
雙燕亦何知故向儂前舞回頭見簾開郎立窗內語  
點點白楊花無心到妾家暫來君不管飛去卽天涯  
花飛雖有期飄落歸無處拾取置帷中不使春拋去

閨中消夏詞

言採薔薇露濯我舊時裳一澣不復再感嘆有遺芳  
鍾情郎莫辭冶容儂未敢相對不盡歡轉嫌夏日短  
朝在荷池東暮在荷池西芙蓉新出水高與儂身齊  
羅衣輕似雪妾身同皎潔常恐月來窺不能掩光耀  
如何冰雪肌香汗無已時說來君不信點點是相思

珠露芰荷裝金盤  
豈惹湯晚來初浴罷  
不及換新妝  
坐久自生涼  
明河當戶落  
流螢止不飛  
照儂過東閣  
樓後錦屏風  
是儂手所製  
背立解鮫綃  
不覺郎潛至  
昨夜郎歸遲  
移燈欲就寢  
風吹羅帳開  
先我上鴛枕  
新織冰蠶絲  
裁爲月半規  
與郎合作扇  
記取早秋時

古別辭

遲遲復遲遲  
最苦是別離  
人生旣到此  
但勸君莫悲

湖上曲

湖月出當心  
湖水明見底  
風浪不生時  
誰能蕩搖此

憶昨

憶昨臨別時  
贈我雙瑤瑜  
上作龍蟠結  
下繫鳳銜珠  
將珠表深心  
團團君須記  
取來置掌中  
宛轉知人意

五言詩集卷九  
五  
酌我鴛鴦壺欲語先悽楚忍淚強持杯杯重不能舉  
明月入懷時擁抱生光輝迴身杳無見太息此空幃  
秋意滿江頭芙蓉不能語日晚風生寒芳心愁殺汝

偶句

舊地忽重過乍逢驚久別有情當此際悲歡俱難說

閨憶

今夕復何夕與郎同莞席審視羅帳空夢醒東方白

惜別

可憐未牽衣已自促歸期含情言不得不是爲相思  
鴻鵠不知歡鴛鴦不知苦高飛與雙棲問君竟誰愈  
將來同心絲重重多委曲引之百尺長卷之只盈束  
舒卷在郎意短長任儂爲疑時不必問相見當自知

春思

桃枝面夕風柳枝背朝景生來喜同居那能不相併

偶興

采葉翠垂衣采花紅映肉可憐人與花恨不早相值

春望

芳草遠連天曉煙籠不住一半作春愁萋萋江上路

口占

說行苦難留說歸苦不早相見能幾時忽已非年少

卽事

盛會不可常美酒休盡意一飲使君歡再飲使君醉

古意

因知今夕苦轉念舊時歡妾心猶自若江月不勝寒

美錦號芙蓉，炫爛光不改。何人製機絲，爲此好容彩。  
容彩人所愛，苦心儂獨知。盛顏處闐闐，惜此三春時。

相逢

未識相逢樂，徒增送遠悲。早知終是別，不敢望郎歸。

偶賦

元鳥正飛來，陽鳥方歸去。江上東風多，誰是相逢處。

咏鏡

不信妾消瘦，見君方自知。取鏡與君照，可能如舊時。

送別

對我作離聲，春風如有情。年年送行處，早未見生。

闌意

一樣溪頭水，各自東西流。明知君有恨，故說妾多愁。

咏琴

君知妾辨音對妾日鳴琴但餘絃外響難盡出中心

樽前

亦知歡不久更請酌金卮妾意盡今夕君醉何能辭

宮怨

竟日無人語花飛永巷門笑啼原妾事悲喜出君恩

山居

問我家何處青山共白雲鳴泉長共語好鳥自忘羣

尋幽

路向山峯轉門連洞口斜此中有流水引出片桃花

有會

有無泉底月是否洞中天巖花不肯語含笑春風前

落英

開時未及攀落後君方捨風起忽他飛令我長太息

感物

有草生幽谷萋萋欲並林榮枯任風雨誰似汝無心  
有木生高陵孤立亦云久女蘿不見攀誰似汝無偶  
有鳥鳴河洲浮波左右流終朝戲蘋藻誰似汝無愁

白茅

白茅露雲中其秀若且潔旣日美人貽無使中道折

憶遠

願言思君子遐瞻勞我心雉鳴猶未已好風益其音

寄友

君曰未有居予曰未有與夙夜所懷憂維茲風及雨

有寄

豈弟維民懷顯允維民則寧君不我思無我忘令德  
金錫彭厥度圭璋昭厥聲寧君不我報無我忘令名  
在庭有鐘鼓在室有鳴琴君如念空谷我豈有遐心

維澤

維澤有香草可以盈我掬維山有喬林可以蔭君室

春思

初春日載陽中庭倏生草草生洵有情君子在遠道  
獨息悲衾稠長夜如三秋君子溫且惠我見反無由  
日出東門隅照我衣紱素有顏如舜華不動君子慕  
採彼北山薇自顧還生悲有心如皎日難速君子歸

擬古



何以飾我身白華作顏色何以明我心綠竹生枝節

偶感

爰驅北園馬于以從君游灌木旣零落黃鳥何相求

有贈

靜言思在昔秉心期與偕誰云我有疾曾不勞君懷

古意

爲君服素錦尙之以朱黃令儀常稱此我見豈不臧

示友

嗟爾塞百卉毋傷唐棣華嗟我乘四牡乃近之子車

贈隱者

與汝游山巔飲余以石泉託身旣幽隱誰爲惜嬋媛

余懷

余懷所難釋秋菊與春蘭秀色自終古芳心未共寒

留別

息駕望長楸湘沅水自流  
簷裳未能涉非是爲君留

玉鎮

玉鎮尙瑤璜申之以蕙芳菲  
澌無因達願致江水旁

言志示左僮奴

微霜初下戒芳莖嘆先零  
華容已衰歇尙欲玩遺馨

美好

美好須矜愛秋風易動容  
自慚非固植豈敢笑飄蓬

有期

申旦期君至黃昏意未來  
夜芳珠被滿修幕惜風開

孟塗前集七言今體絕句卷十

桐城劉開明東

懷馬獻生

故人春半入長安  
千里青山馬上看  
我亦登樓望煙水  
楊花如雪落江干

偶興

皖公山水初生流  
盡天涯送客情  
更踏芙蓉樓畔月  
鄉心一夜滿江城

蘋花渺渺隔江流  
好鳥當空語未休  
我自多愁言不得  
春風傳與木蘭舟

擬唐人邊庭四時詞

邊草茫茫苦未青  
交河西望接空冥  
垂楊不是無春色  
只許征

人曲裏聽

昨報天書出上蘭火龍銜送陣雲端傳聞避暑芙蓉院正是長城六月寒

黑水環流縹塞頭高高月照古涼州軍中莫訝西風至邊地從來總似秋

終歲家山雁斷音紫臺人靜覺寒深朔風今夜天山雪猶是來年馬上心

宮怨

翠輦三春未到門名花開落自黃昏君王若果輕顏色長夜深宮敢望恩

珠簾幾曲隱深秋別院香風動玉鈎可惜鴛鴦池上月年年長照倚孤樓

寶鼎名香燕未消雲連永巷望迢迢似聞昨夜新開宴玉殿風和罷早朝

有贈

舞衣輕舉若離筵凝睇宜愁又獨前我見榮華猶惜去好風那得不回旋

擬古

白沙路繞曲江干玉笛吹來月下寒一夜行人齊駐馬落梅聲裏卽長安

有懷

白雲西起雁南飛有客天涯尙未歸極目關河秋氣早霜花無那上征衣

買得江頭一葉舟年年欲向浙東游秋風未起芙蓉老落月無

聲水自愁

舟中望九峯

鄉心曾寄九華峯  
知落雲中第幾重  
今日孤舟江上望  
天風吹出碧芙蓉

古意

金絲作結玉垂璫  
雲鳳斜連白練裳  
正有容華可傾國  
青春偏自惜瑤芳

卽事

誰家游客立江干  
目送飛花下錦湍  
馬上歸來天未晚  
高樓人倚碧雲寒

迴廊九曲挂簾鉤  
簾外天光似水流  
夜靜不聞銀漢轉  
黃姑已到月西頭

豔歌曲

鴛鴦三十六成行飛去飛來繞畫堂但願年年歌舞處秋風吹不到君旁

咏楊花

垂柳垂楊拂路塵飛花無數逐行人可堪三月逢搖落辛苦春愁問水濱

秋夜

碧城花好未經看星月高高秋又闌莫把冰漿和露飲樓臺昨夜北風寒

皖城口占

凌空塔勢遠浮煙繞郭濤聲半入船風雨欲來天忽霽萬山雲影落樽前

春思

馬上人誰問落花離愁終古在天涯春風欲寄江頭意遠渚滄波日又斜

闌怨

節使三河尙募兵深閨空自計歸程遼西日夜無消息又聽城頭畫角聲

次樅陽

曉風吹雨過江來一葉輕舟破浪開繫纜洲前天未晚寒雲已暗射蛟臺

秋懷

銀河湧出水精盤影落天涯幾處看多少浮雲遮不住客心長共碧天寒



夜集

波紋簾影漾空明  
華燭煙高接太清  
報道孤鴻天外落  
關河一夕變秋聲

秦淮竹枝詞

桃李當春滿路芳  
鶯聲歷亂過東牆  
農家近住橫塘渡  
人說遙天水一方

紫陌香風拂繡鞍  
無端春色上闌干  
門前新種櫻桃樹  
郎馬來時仔細看

白石臺前列綺羅  
紫蘭開後客頻過  
阿儂生長吳江曲  
不識春愁似水多

數點飛鴉過遠村  
隔樓人語近黃昏  
風流爭說章臺柳  
何似青靑白下門

昨夜廊前月正高  
夢隨春水上蘭橈  
依稀記得秦淮路  
芳草萋萋到板橋

金作高堂玉作樓  
朝朝絲管起江頭  
游人不解春風恨  
偏向儂前問莫愁

偶句

危樓高共碧峯齊  
倒映前村月一溪  
半面銀河低不落  
寒鴉飛過楚雲西

卽席

高館華筵啟暮天  
明燈寶帳宴羣仙  
酒酣忽弄雲邊瑟  
一夜春心五十絃

闌情

蓮漏聲聲聽欲闌  
惜花猶自立闌干  
合歡夜夜當堦好  
不識梧

桐葉上寒

少年行

拾取珊瑚七寶鞭踏春橫過酒樓前醉來花下何須問走馬長  
干舊少年

錦帶吳鉤玉作環金鞍珠勒出雲間不知射獵今何去笑指城  
南近處山

卷石山房宴集

故人置酒碧雲樓招我停車古渡頭風捲片雲天似墨四山葉  
落雨聲秋

華筵人進紫霞杯歌管聲聲隔座催一斗梨花春未足夜深還  
有玉漿來

梨園子弟酒初酣龍笛鸞簫譜舊諳歌到鷓鴣聲乍轉半天秋

思在江南

重重飛塔影玲瓏  
鳳蠟千枝映樹紅  
無那高天雲萬里  
不教明月到牆東

空庭雨氣欲成煙  
一夕仙風入管絃  
聞說開元遺曲在  
令人腸斷李龜年

五侯鯖滿翠盤中  
餐罷銀絲酒正紅  
尙有香羹和玉葉  
海棠花下賜侯同

玳瑁筵中列玉盤  
銀壺冰煖燭光寒  
不知今夜秋多少  
又報堦前白露團

金枝燈滿瑞煙開  
鐵葉門高舞袖迴  
幾度彩雲飛不散  
天風吹入酒杯來

鴛柱鸞絃試再彈  
相思遙入楚雲端  
王孫愛聽涼州曲  
簾外秋

風夜已闌

才名我愧柳郎中  
又見流霞貯碧筒  
飲罷不知秋夜永  
涼雲飄落桂堂東

寄遠

蒲桃美錦共湘紈  
製就新衣寄遠看  
月下人驚好顏色  
秋來不奈客中寒

華陽鎮阻風

楊柳依依春草芳  
征帆日夕滯雷陽  
大江隔斷青山色  
天末雲垂是故鄉

七夕

歡情不及別愁多  
已向橋邊怨逝波  
可奈人間小兒女  
又將心事訴銀河

前蜀宮詞十六首

鳳閣連雲起益州萬春門裏建長秋二徐姊妹多顏色何事君

王愛解愁

潘炕妾名

帳殿帷宮布玉塵無端妖鳥集池濱永陵一夜金蠶冷已報宣

華月色新

昇仙橋下水流東北狩旌旗映日紅道是彩舟天半出內家齊

在五雲中

益昌江上駐金鸞衣錦舟人兩岸看親製閨中新水調可憐銀

漢不勝寒

名苑修成燦碧瑤丹霞亭子坐仙姝酒酣不覺芳香發偷向樽

前解繡襦

夜靜重光樂未央碧梧枝上露如霜更催玉酒開新宴坐看嘉

王淚數行

深院沉沉氣寂寥  
百花爭放媚春宵  
後宮佳麗皆傾國  
度曲偏推李玉簫

已聞下詔選良家  
二十才人奉翠華  
尙有猜疑罪軍使  
傷心阿女貌如花

酒家夜夜暗停斡  
別殿朝朝擁鳳幃  
從此宮中寒不到  
肥遺昨日見紅樓

亭號怡神透碧櫺  
傳聞上已駐雲耕  
風前自奏霓裳曲  
贏得宮人竟夜聽

寢陵朝罷六龍回  
珠翠如雲奉御杯  
醉拂霞衣隨輦去  
道旁驚是女冠來

寶鼎煙濃玉殿香  
六宮朱粉鬪朝陽  
休誇白雪梨花豔  
點額人

今愛醉妝

內使傳呼禱上清玉鸞金輅幸青城如何自惜天人貌偏被江山看出行  
雲霞妙服叩仙關絕嶺風高響佩環譜得甘州詞一曲聲聲哀怨落人間

丈人峯聳接遙天珠碧看來瑞靄連夜上星壇最高處太妃含笑月華邊  
已駭鸞鶴人空明萬騎同歸炫錦城爲報徹天王氣在金華殿上莫言兵

後蜀宮詞

寶帳羣分壁月光依然宮寢耀珠璫瓊華公主知何意花朶關情又麝香



法雲寺裏慶千秋燈火中元月影流傳說官家今夜降異香先到鳳皇樓

元夜笙歌進玉漿觀燈親召露臺倡上方十萬金錢費特賜青樓李艷娘

牡丹苑裏駐雕輪十色花開別樣新三月風和吹不盡天香飛作後宮春

使者三川駕錦駟鈿車采選遍西南可憐兒女驚婚日歌舞深宮酒正酣

安蹕容顏似舜英保香位秩比公卿從今別院生春色內品新加十四名

浣花溪上御龍舟士女傾城盡出游雲影花光看未足回頭宮月上銀鈎

女牆繡幕護芙蓉九月開時照眼紅四面彩霞齊作障看花人  
坐錦城中

殿角風高報歲闌碧綾帷捲怯輕寒年年獻得金花樹大府躊  
躇給內官

虛說宮中第一人太華玉貌委芳塵淒涼半幅紅龍褥獨卧空  
山草不春

淚落鈿殘苦夢思白楊風起暮寒時長生枉自修金簡寂寞人  
間李鍊師

花蘂才名振帝鄉煌明帳暖度春芳無端遺卻樓頭扇從此西  
川號雪香

水殿重重挂玉鈎開筵池上按梁州生來玉骨清無汗長悲風  
寒不奈秋

總卒紅顏到馬前  
梨花芳草淡寒煙  
新詞譜向朝天驛  
愁絕春風聽杜鵑

席上贈歌者

水晶簾外紫鸞笙  
玉手攜來月乍橫  
一曲梅花歌未畢  
西風吹作斷腸聲

黃金爲液玉爲漿  
持向樽前勸客嘗  
今夜月明須盡飲  
梧桐秋露未成霜

蘭膏明燭照寒宵  
人立西風影動搖  
三百霓裳都舞遍  
酒酣重奏鬱輪袍

鴛鴦瓦上斂寒暉  
玉蟻杯殘客未歸  
更把洞簫催夜月  
曲終還看白雲飛

偶成

朝尋瑤草過前山夕採寒芳下石關  
踏遍白雲三萬疊不知秋在馬蹄間

乞巧詞

人世爭傳乞巧期巧如天上尙相思  
阿儂不向銀河乞乞得來時恐別離

星漢橫斜又幾時半宵歡會一年悲  
天孫原不矜多巧願與人間好女兒

送行

送行猶記別時容偏是情多易惱儂  
數載愁懷傾一夕人生禁得幾相逢

與雲朗小集

碧霄無際水南流故友相逢水上舟  
盡日垂簾坐高閣一城細

雨似春愁

遣興

青虬駕乘白螭駟載得靈旗拂翠嵐行盡天邊芳草路雲中不識洞庭南

卽事

香氣凝煙艾正焚緒風冉冉竟疑君無端飄散神靈雨日暮江皋不見雲

秋思贈宮鐵橋

寥落天高更氣清蟬聲寂寞雁南征薄寒獨處猶惆悵臨水登山况送行

書懷寄嚴虛白明府

素華綠葉信無多江上飄搖奈女何我有幽懷託君子佳期日

遠對空波

神女

神女飛翔隱霧高鳳皇辭拙意徒勞采衣未動芳華解落日流  
雲滿漢臯

宴集

晨張羅綺飾高堂夕進蘭膏樂未央元玉梁中雲欲散有人含  
笑贈余芳

江籬

江籬怨我夕來遲月出歌終露已滋江介風多華落盡玉參差  
好爲誰吹

寄友

淮南木落思無端蘭不齊芳畏歲闌莫問小山舊叢桂水雲千

詞

嬌容脩態爲君娛  
遺視流光近若無  
佩有瑤華憐不得  
東風今已綠薜蘿

寄陳顧卿

菱荷爲蓋桂爲舟  
就遠離鄉易感秋  
瞻望涔陽行未已  
風吹落葉下芳洲

懷石甫

三秋不見已興悲  
今我來思又未歸  
知爾採薇山路遠  
白駒行處雨霏霏

有感

我阻山川苦路長  
勞心竟日未余臧  
莫言莫楚無家樂  
昨夜風

吹萎道旁

桑葉

桑葉微黃露欲晞我來自北雁初飛風飄陰雨歸何處九月征人未授衣

彼美

彼美乘舟澤有波興言宿愛泗滂沱若華獨自矜顏色人道芳椒結實多

感舊

隸馬人旋花葉垂倉庚飛起日遲遲標梅深悔逢春早何似天桃後及時

自嘲

陟嶺言歸日正涼在梁有鶴欲同翔蜉蝣笑我無容彩舊歲羅



衣尙禦霜

旅館寒夜詞

數點殘雲欲渡河  
蕭蕭斷雁客中過  
天涯一樣關城雪  
寒到愁人枕上多

絳蠟沉沉夜未央  
金爐焰斷不聞香  
孤衾已覺無歡思  
可奈殘更夢故鄉

村落千家靜掩扉  
城頭風勁角聲微  
可憐雪夜三冬路  
猶有征人出未歸

落月低樓影半橫  
疎星渡漢雁長征  
鄰家少婦衣裳薄  
直擁流蘇坐待明

蕭條梁苑樽誰覓  
飄渺吳山夢久空  
不是空齋愁不寐  
無由聽遍五更鐘

闕詞

畫樓西畔雨聲殘  
人立雕牕半倚欄  
莫怪風前怯衣薄  
杏花原不奈春寒

王孫一去草萋萋  
繡屋春深鳥亂啼  
滿地殘紅人不掃  
東風吹過野橋西

珠簾十二捲殘霞  
脩竹廊前影半斜  
休怨歸鴻啼夜月  
小牕從不夢梨花

寄懷倪穎符

日日東風長碧蕪  
陌頭芳草近城隅  
扁舟不泛雷陽月  
辜負桃花七百株

感游

杏花春雨綠楊煙  
小別江南又一年  
重向酒旗風裏過  
無人知

是杜楚川